

- जी.एस.टी. परिषद री 55वीं मीटिंग 21 दिसंबर ने जैसलमेर में मांय राख्खी जावेला।
- राजस्थान हाई कोर्ट एसआई भर्ती परीक्षा-2021 मांय चुणी ज्या उप निरीक्षकां रा मामला मांय यथास्थिति बणायी राखण रा हुकम दीना।
- केन्द्रीय कौशल विकास अर उद्यमिता मंत्रालय री ओर ऊं काल भरतपुर मांय कौशल महोत्सव राख्यो जावेला।
- प्रदेश मांय घणखर ठौड़ां पारो उत्तरण ऊं सर्दी रो असर बधबा लाग्यो।

000

जीएसटी परिषद री 55वीं बैठक 21 दिसंबर ने जैसलमेर मांय राख्खी जावेला। मीटिंग मांय वित्त मंत्री निर्मला सीतारमण अर न्यारा-न्यारा राज्यां रा वित्त मंत्री सिरकत करेला। परिषद री मीटिंग पैली इण ई महीना मांय व्हेवणी ही पण महाराष्ट्र अर झारखंड मांय विधानसभा चुनाव अर फेर संसद रा सियाळू सत्र रे कारण इण मांय मोड़ो व्हे रह्यो है। मीटिंग रे दौरान, राज्य री वित्त मंत्री 1 फरवरी, 2025 ने पेश कर्या जावण वाळा माली साल 2025-26 रा बजट रा बारा मांय विचार पेश करेला।

000

राष्ट्रीय युवा महोत्सव 2025 ने विकसित भारत युवा नेता संवाद रा तौर ऊं मनायो जावेला। केंद्रीय युवा कार्य अर खेल मंत्री डॉ. मनसुख मांडविया आज नई दिल्ली मांय खबरनवीसां ने आ जाणकारी दीनी। वे बतायो के ओ मंच नौजवानां ने प्रधानमंत्री नरेंद्र मोदी सामी बातचीत करण अर वां रो नजरियो पेश करण रो मौको देवेला।

श्री मांडविया कह्यो के ई बातचीत रो मकसद देश भर रा नौजवानां री प्रतिभा री पिछाण कर र वां ने विकसित करणो है। ई सागे ई वां ने विकसित भारत बणावण बाबत् वां रो नजरियो साझा करण रो सुबीतो मुहैया करावण सारू असरदार मंच मुहैया करणो है। ई बीचे पाली मांय आज जिला कलेक्टर अर एस.पी. री मौजूदगी मांय युवा महोत्सव रा पोस्टर रो विमोचन करी ज्यो।

000

राजस्थान हाई कोर्ट एसआई भर्ती परीक्षा-2021 मांय पास व्हे र सिखावण ले रह्या उप निरीक्षकां रा मामला मांय यथास्थिति बणायी राखण रा हुकम दीना है। कैलाश चंद शर्मा अर दूजां री अर्जी माथे सुणवाई करता थकां जज समीर जैन री एकलपीठ ओ हुकम दीनो। हाई कोर्ट रा आज रा हुकम ऊं सिखावण ले रह्या उप निरीक्षकां री पार्सिंग आउट परेड अर तैनाती माथे संशय पैदा व्हे ग्यो है। अर्जी देवण वाळां रा वकील हरेंद्र नील बतायो के उप निरीक्षक री भर्ती परीक्षा मांय व्ह्या कथित फर्जीवाड़ा ऊं आ उम्मीदवारां रा हितां माथे असर पड़्यो है। ध्यानजोग है के ई मामला मांय एसओजी हाल ताई सिखावण ले रह्या 50 ऊं बत्ता उप-निरीक्षकां ने गिरफ्तार कीना है।

000

आज जयपुर रो स्थापना दिवस मनायो जा रह्यो है। साल 1727 मांय आज ही रा दिन जयपुर री स्थापना करी ज्यी ही। ई मौके राज्यपाल हरिभाऊ बागडे जनता ने शुभकामनावां दीनी है। राज्यपाल वां रा संदेश मांय कह्यो के जयपुर भारतीय वास्तु संस्कृति री अनुपम मिसाल है। वे कह्यो के नगर-नियोजन रा जाणकार विद्याधर भट्टाचार्य विश्व विरासत मांय शामिल जयपुर सरीखो सुव्यवस्थित अर आधुनिक शहर बसायो हो। वे जनता ऊं शहर री वास्तु संस्कृति अर सुन्दरता सागे साफ-सफाई राखण मांय भागीदारी करण बाबत् कह्यो। जयपुर रा स्थापना दिवस रे मौके न्यारा-न्यारा कार्यक्रम राख्या जा रह्या है। आज संवारे मोतीझूंगरी गणेश मंदिर मांय खास

पूजा—अर्चना सागे महाआरती करी ज्यी। जयपुर रा आराध्य देव गोविंद देवजी रा मंदिर मांय ई पूजा अर्चना करी ज्यी। अब ऊं थोड़ी देर पैली स्टेच्यू सर्कल माथे दीपदान रो कार्यकम राख्यी ज्यो। ई सागे ई अल्बर्ट हॉल सामी जयपुर लोकरंग उत्सव राख्यो जा रह्यो है। लोकरंग मांय 150 ऊं बत्ता लोक कलाकार राजस्थानी लोक गीत अर नृत्य पेश कर्या जावेला। आं मांय कालबेलिया नर्तकी गुलाबो सपेरा अर गायक थानू खां री प्रस्तुति ई शामिल है।

000

पंजाब रा राज्यपाल गुलाब चंद कटारिया आज नाथद्वारा मांय स्वतंत्रता सेनानी मदन मोहन सोमटिया रे देवलोक व्हेवण परां वां रा पिरवार वाळां सागे मुलाकात कर र वां ने संबल दीनो। वे स्वतंत्रता सेनानी सोमटिया री जिन्दगी रा बारा मांय जाणकारी लीनी। राजसमंद जिला रा स्वतंत्रता सेनानियां मांय ऊं केवल सोमटिया ही हाल ताई जीवित हा। श्री कटारिया उदयपुर सिटी स्टेशन ऊं जिला कलेक्टर रा रहवास ताई प्रस्तावित टू लेन एलीवेटेड रोड रा काम रो भूमि पूजन कीनो।

000

1962 मांय चीन रे खिलाफ व्ही लड़ाई रे दौरान देश सारू जान री बाजी लगा देवण वाळा परमवीर चक्र ऊं नवाजी ज्या मेजर शैतान सिंह रा 62 वां बलिदान दिवस रे मौके आज वां ने सिरधा भाव सागे याद करी ज्या। ई मौके जोधपुर रा जिला कलेक्टर गौरव अग्रवाल अर मेजर शैतान सिंह रा बेटा नरपत सिंह भाटी मेजर री मूरत माथे फूल चढ़ा र वां ने याद कीना।

ई मौके मैकेनाइज्ड इन्फेंट्री बटालियन री ओर ऊं मेजर शैतान सिंह ने हथियारां ऊं सलामी अर गार्ड ऑफ ऑनर दियो ज्यो।

000

कौशल विकास अर उद्यमिता मंत्रालय री ओर ऊं काल भरतपुर मांय कौशल महोत्सव राख्यो जावेला। महारानी श्री जया कॉलेज मांय राख्या जावण वाळा ई महोत्व रो उद्घाटन केन्द्रीय कौशल विकास अर उद्यमिता मंत्री जयंत चौधरी करेला। नेशनल स्किल डवलपमेंट कॉरपोरेशन रा सीईओ वेदमणी तिवारी बतायो के इण मांय शिरकत करण सारू 7 हजार ऊं बत्ता नौजवान नाम मण्डाया है।

-----

श्री तिवारी बतायो के ई कौशल विकास महोत्सव मांय करीब 70 कम्पनियां नौजवानां ने नौकरियां देवेला।

000

संसदीय कार्य अर विधि मंत्री जोगाराम पटेल आज जोधपुर जिला मांय सालावास रा उप जिला अस्पताल रो औचक दौरा कीनो। वे सामान्य ओपीडी, जापा रा कमरा, ऑपरेशन थिएटर, न्यारा—न्यारा वार्ड्स अर दवाइयां रा स्टॉक री जाणकारी लीनी। संसदीय कार्य मंत्री अस्पताल परिसर अर सगळा वार्ड मांय सफाई व्यवस्था तैय करण रा हुकम दीना।

000

प्रदेश मांय घणखर ठौड़ां पारो उत्तरण सागे ठण्ड रो असर बघबा लाग्यो है। मौसम विभाग ऊं मिली जाणकारी रे मुजब राज्य मांय 18 ठौड़ां रात री बगत पारो 15 डिग्री सेल्सियस या इण ऊं नीचे उतर ग्यो है। सब ऊं कम 9 डिग्री सेल्सियस तापमान माउंट आबू मांय दर्ज करी ज्यो। मैदानी हलकां मांय सीकर जिला रो फतेहपुर सब ऊं सीळो रह्यो जठे तापमान 9 दशमलव 2 डिग्री सेल्सियस दर्ज करी ज्यो। राजधानी जयपुर मांय ई न्यूनतम तापमान 14 डिग्री सेल्सियस नापी ज्यो। ठण्ड मांय बघोतरी सागे ई केई

ठौड़ां आज संवारे कोहरो रह्यो। भरतपुर मांय कोहरा रे कारण हाई-वे परां आवण जावण मांय परेशानी महसूस व्ही।

प्रदेश रा उतराद हलकां मांय ई कोहरा रो असर रह्यो। ई बीचे मौसम विभाग आवता दिनां मांय मौसम सूखो रहवण रा आसार जताया है। विभाग रे मुजब आवता 2-3 दिन श्रीगंगानगर, हनुमानगढ़, झुन्झुनू, सीकर अर चूरू जिलां रा कुछ हलकां मांय घणी धुंअर रहवण रा आसार है। महकमो आवता 5 दिन मांय प्रदेश रा घणखर हलकां मांय न्यूनतम तापमान 1 ऊं 2 डिग्री सेल्सियस उतरण रा आसार जताया है।

000

सवाईमाधोपुर जिला रा रणथम्भौर राष्ट्रीय बाघ अभ्यारण्य मांय दीवाळी पाछे ऊं मोटी तादाद मांय सैलाणी पूग रह्या रह्या है। उद्यान री सैर करण सारू सगळा टिकट बिक गया है।

-----

000

डीग रा किशन लाल जोशी उच्च माध्यमिक विद्यालय मांय आज दिव्यांगजन शिविर लगायी ज्यो। समाज कल्याण अधिकारी प्रवीण कुमार बतायो के कुम्हेर अर कामां मांय ई ऐड़ा शिविर लगायी ज्यो है। आं शिविरां मांय मौके ई दिव्यांगजन ने दिव्यांगता प्रमाण पत्र जारी कर्या जा रह्या है। ई सागे ई राज्य सरकार कानी ऊं चलायी जा रही विशेष योग्यजन स्वरोजगार ऋण योजना, पालनहार योजना अर सामाजिक सुरक्षा पेंशन योजना समेत वां रा भला री न्यारी-न्यारी योजनावां रा बारा मांय दिव्यांगजन ने जाणकारी दी जा रही है। ई सागे ई दिव्यांगजन रे काम आवण वाळा साज-ओ-सामान मुहैया करावण सारू पात्र दिव्यांगजन री पिछाण करी जा रही है।

000

चूरू जिला रा सरदार शहर मांय सरकारी मोल माथे खरीदी सारू मूंगफली री तुलाई रो काम आज सुरू व्हे ग्यो। हाल ताई 1 हजार 8 सौ ऊं बत्ता काश्तकार सरकारी मोल माथे मूंगफली बेचण सारू नाम मण्डाया है।

000

बालोतरा मांय पैली वाळा केंद्रीय मंत्री कैलाश चौधरी आज "वन्दे भारत" पार्क रो उद्घाटन कीनो। इण मांय जनता ने कसरत घर अर वॉकिंग ट्रेक समेत न्यारा-न्यारा सुबीता मिलेला।

000

प्रधानमंत्री सुरक्षित मातृत्व अभियान रा तहत पाली जिला रा सोजत मांय आज शिविर लगायी ज्यो। सरकारी अस्पताल मांय लगायी ज्यो ई शिविर मांय आस वाळी लुगाइयां री मुफ्त जाँच कर र दवाइयां दीरीजी अर पोषण रा बारा मांय सलाह दीरीजी। शिविर मांय गर्भावस्था रे दौरान ध्यान राखण वाळी बातां री जाणकारी ई दीरीजी अर खून री कमी वाळी महिलावां ने भर्ती कर र वां रो ईलाज सुरू करी ज्यो। दूजी कानी जालोर रा पी. एम. श्री केन्द्रीय विद्यालय मांय विद्यार्थियां री स्वास्थ्य जाँच सारू शिविर लगायी ज्यो। इण मांय सरकारी अस्पताल रा डॉक्टरां कानी ऊं दांतां, आंख्यां, नाक, कान अर गळा री जाँच कर र जरूरी राय दीरीजी।

000